

## ‘BATAKURU PUULUSA ARANURU HAA E BE KORENTI BEN’

<sup>1</sup> Immorde e an min Puulusa, mo Alla noddiri kodduruyee mun on fii wonugol \*sahaabaajo Iisaa Almasiihu on, e oo musidfo wi'eteedo Sosteene, <sup>2</sup> haa e ngal \*moftal Alla wongal Korenti, subiraabe humondiral e Iisaa Almasiihu on, noddaabe wonugol yimbe Alla, wondude e kala jantotoobe innde Iisaa Almasiihu Joomi men on nokku kala ka be woniri, d'un ko on Joomi mabbe e Joomi men.

<sup>3</sup> Yo moyyere e buttu wonan on, immorde e Alla Baaba men, e Iisaa Almasiihu Joomi on.

### *Fii no Puulusa Jarniri Alla fii be Korenti ben*

<sup>4</sup> Mido duumii e jarnugol Alla fii mon, fii moyyere nde Alla yedi on nden sabu Iisaa Almasiihu on, <sup>5</sup> d'un ko e nder humondiral e makko alfsirdon kala huunde e kala kongol e kala gandal. <sup>6</sup> Ko fii seeditoore \*Almasiihu on tabintinaama few e mon. <sup>7</sup> Ko d'un wadi jooni, dokkal woo ηakkanaa on e nder ndee habbannde nde wondon e mun fii feenoygol Iisaa Almasiihu Joomi men on. <sup>8</sup> O tiidinay on kadi haa ka rawnoode, fii wota on laatoyo felniibe jande ardu Iisaa Almasiihu Joomi men on. <sup>9</sup> Alla ko Sella-Findeejo, d'un ko on Noddudo on fii yubbondirgol e Biddo makko on, Iisaa Almasiihu Joomi men on.

*Fii Sendondiral Mofte Korenti den*

<sup>10</sup> Mi wakkilinii on, yo musibbe, e innde Iissaa Almasiihu Joomi men on, on fow jogee kongol gootol fii wota sendondiral wonu hakkunde mon, e maanaa fedde-fedde, kono wonee e nder nanondiral tiidungal e nder mijo wooto e hakkille goote. <sup>11</sup> Ko fii, yo musibbe an, bee yimbe oo debbo wi'eteedo Kuluyee humpitii lan fii mon wonde, yeddondire no hakkunde mon. <sup>12</sup> Mi nanii wonde mo kala e mon no wi'a «min, ko mo mi Puulusa», oya kadi wi'a «ko mo mi Apoloosi», goddo on kadi wi'a «ko mo mi Petruusu», oya on wi'a «ko mo mi Almasiihu on!»

<sup>13</sup> E hara Almasiihu on senditino? Kaa Puulusa fempano fii mon? Kaa ko e innde Puulusa \*lootiradon maande kisiyee? <sup>14</sup> Awa mi weltanike Alla ko tawi kon mi lootaali hay gooto e mon maande kisiyee, si hinaa Kirispusa e Gayuusi. <sup>15</sup> Ko dfun wadi, hay gooto waawataa wi'ude ko e innde an lootiradon maande kisiyee. <sup>16</sup> Mi lootii kadi beynguure Astefaana nden, ko heddi kon, mi andaa si mi lootii goddo goo. <sup>17</sup> Ko fii Almasiihu on nulaali lan fii lootugol maande kisiyee, kono ko fii fejningol Kibaaru Mooyo on. Dun non, hinaa immorde e kongudi faamu neddanke, fii wota \*leggal altindiraangal Almasiihu on meerine.

*Fii Faamu Aduna on e Faamu Allaahu on*

<sup>18</sup> Ko fii kibaaru leggal altindiraangal ngal no wa'ani wonbe mulude ben wa feetere. Kono enen, wonaabé dandeede ben, ko o bawgal Alla.

<sup>19</sup> Ko fii no windii:

«Mi mulay faamu faamube ben,

mi mehindina hakkillaaji jooma-hakkil en.»<sup>a</sup>

<sup>20</sup> Awa ko honto woni faamudo on, maa fensi-toowo on, maa liddondirteedo e nguu jamaanu on woni? E hara Alla waylaali faamu aduna on, watti feetere? <sup>21</sup> Ko fii, bay aduna on e faamu mun ngun andaali Alla e nder faamu Alla ngun, tawi no wela Alla ka o dandira gomdinbe ben waaju men wa'ungu wa feetere ngun. <sup>22</sup> Tawi \*Yahuudiyankeeben no landoo fii maandeeji hawniidi, \*Gereekiyankeeben kapun no dabba faamu ngun, <sup>23</sup> kono enen hidien waajaade fii Almasiihu fempaado on. Dun no wonani Yahuudiyankeeben peggal, wa'ani be wonaa Yahuudiyanke ben wa feetere, <sup>24</sup> kono noddaabe ben, woni ko Yahuudiyanke, woni ko Gereekiyanke, Almasiihu on ko bawgal Alla e faamu makko kanko Alla. <sup>25</sup> Ko wa'i wa feetere iwrunde ka Alla nden no buri faamu yimbe ben. Awa kadi, ko wa'i wa lo'ere iwrunde ka Alla nden no buri doole yimbe ben.

<sup>26</sup> Mijitee, yo musibbe, no wonirnodson fewndo noddadon. E yeeso neddanke, tawi buy e hakkunde mon wonaa faamuube, maa marbe doole, maa rimbe. <sup>27</sup> Kono Alla subike piiji wa'udi wa feetufi e nder oo aduna fii hersingol faamuube ben, Alla subii kadi piiji wa'udi wa lo'udi e nder oo aduna fii hersingol dolnudi din. <sup>28</sup> Alla subii kadi piiji kaanudi din e oo aduna, din anaadfi, din di wonaano huunde, fii mehindingol woodaadi din, <sup>29</sup> fii wota hay gooto mawnintino yeeso Alla. <sup>30</sup> E hin-le, ko kanko humindiri on e Iisaa Almasiihu on, on mo tawata

---

<sup>a</sup> **1:19** 1.19 Isa. 29.14

ko e immorde e Alla wadfira fii men faamu e peewal e \*senaare e cottudi,<sup>31</sup> fii, wano windori non:

«On mo no mantoo,  
yo mantor Joomiraado on.»<sup>b</sup>

## 2

<sup>1</sup> Min non, yo musibbe an, fewndo mi yahunoo ka mon fii fejjinangol on goonga Alla wirninoodo on, hinaa burnondiro kongudi maa faamu mi yaari. <sup>2</sup> Ko fii mi taw moyyaa ka mi ndaara godsun goo hakkunde mon, si hinaa Iissaa Almasiihu, tempaado on. <sup>3</sup> Min tigi mido wonirnoo takko mon e noone no lo'iri e kulol e diwnol tiifungol. <sup>4</sup> Kongol an ngol e waaju an ngun aldaano e kongudi weldi e faamu neddfanke, kono ko wondunoodi e maandeeji bangindi bawgal Ruuhu Alla on, <sup>5</sup> fii wota gomfinal mon ngal iwru e faamuji yimbe ben, kono e bawgal Alla ngal.

### *Fii Faamu Haqiqawu ngun*

<sup>6</sup> Kono fow e mun, ko faamu men waajotoo mokobaabe ben, hara ko faamu ngu tawata hinaa ngu oo aduna, hinaa ngu laamuji oo aduna kadi muloyteedfi. <sup>7</sup> Ko faamu Alla wondsen waajaade, d'un ko ngun wirninoongu e nder gundoo, ngu Alla ebbannoo fii darja men on ado aduna on tageede. <sup>8</sup> Laamu woo e dii laamuji oo aduna andaano d'un. Ko fii si be anduno, be tempataano on Jom mangural. <sup>9</sup> Kono ko wano windori non:

«Ko Alla ebbani yidubé mo ben kon,

---

b 1:31 1.31 Yer. 9.23

ko d<sup>u</sup>n woni yiitere yi'aali, nowru nanaali,  
e ko bernde nedfanke miijaaki.»<sup>c</sup>

**10** Ko e men Alla banginiri d<sup>u</sup>n Ruuhu mun on.

Ko fii Ruuhu on hollay ko woni woo, hay piiji Alla luggudi d<sup>in</sup>. **11** Ko hombo e hakkunde yimbe ben andi ko woni e neddo, si hinaa ruuhu wondo e makko on. Ko wano non kadi, gooto waawataa andude ko woni e Alla, si wonaa Ruuhu Allaahu on. **12** E hin-le enen, hinaa ruuhu oo aduna hendiden, kono ko Ruuhu iwrudo e Alla, fii no andiren ko Alla yediri en sulfu makko on kon.

**13** En alaa wowlirde d<sup>u</sup>n yewtereeji di faamu nedfanke jannata, kono ko di Ruuhu Allaahu on jannata d<sup>in</sup>, e nder sifanagol yimbe be on Ruuhu woni e mun ben haqqiaaji iwrudi e on Ruuhu. **14** Kono neddo mo aldaa e Ruuhu Allaahu on jabataa piiji Ruuhu Alla d<sup>in</sup>, ko fii ko di feetere e makko, o waawataa di andude, ko fii ko Ruuhu Allaahu on di taskortee. **15** Kono neddo mo Ruuhu Allaahu on woni e mun on taskoto ko woni woo, kono kanko hay gooto hewtaa taskagol mo. **16** E hoore d<sup>u</sup>n:

«Ko hombo andi mijo Joomiraado on fii jannugol mo?»<sup>d</sup>

E hin-le enen ko mijo \*Almasiihu on jogidен.

### 3

#### *Fii no Kurkaadi Alla d<sup>in</sup> Haani Wonirde*

**1** Kono min non, yo musibbe, mi waawaali on yewtirde wa yimbe be Ruuhu Allaahu on woni e mun, kono ko wa jokkube mbeleede bandu, e booboobe e telen-ma gomfinal \*Almasiihu on.

c **2:9** 2.9 Isa. 64.3

d **2:16** 2.16 Isa. 40.13

<sup>2</sup> Ko biraadan mi jonnunoo on, hinaa jaametee teddudo, ko fii on waawataano mo townude. Hay fewndo doo non on waawataa mo townude.  
<sup>3</sup> Ko fii haa jooni ko on jokkubē mbeleedē bandu. Bay nawliigu e yeddondiral no hakkunde mon, taw si hinaa on jokkubē mbeleedē bandu? Kaa hinaa no neddsanke fow wonirta non wonirdon?  
<sup>4</sup> Si goddo e mon wi'ii: «min ko mo mi Puulusa», oya on wi'a: «ko mo mi Apoloosi», taw si hara on gerdaali wa yimbe aduna?

<sup>5</sup> Awa ko hondun woni Apoloosi? E ko hondun woni Puulusa? Ko kurkaaduube ḫe gomdinirdon sabu mun. Mo kala e ma᷑be kurkorani Joomiraado on golle de o halfini mo ḫen. <sup>6</sup> Min mi tutu, Apoloosi yarni, kono ko Allaahu on mawnini. <sup>7</sup> Ko dūn wadi hinaa tutudo on woni goddun, hinaa kadi yarnudo on, kono ko Alla mawnindo on. <sup>8</sup> Tutudo on e yarnudo on no fota, mo kala e ma᷑be hendoto njoddi mun ndin tigi tippude e golle de ontigi wadi ḫen. <sup>9</sup> Ko fii, ko men gollidoobe fii Alla, onon ko on ngesa Alla, ko on darnoodi makko kadi. <sup>10</sup> Wano Alla yedirimmi moyyere non, mi golliri wa faamudo fii darnugol, mi wadii ndelo ngon. Goddo kadi darnii e hoore mun, kono yo mo kala reeno e noone no darnirta e hoore mun non. <sup>11</sup> Fii ndelo ngon kan, hay gooto waawataa moyyinde ndelo goo si wonaa wongo don ngon, e maanaa ḫun ko Iisaa Almasihu on. <sup>12</sup> E hin-le, si goddo aru e darnirde e hoore ngon ndelo don maadi kaŋje maa kaalisi maa kaaye hittude maa ledse maa hudo kalin maa foron fojne, <sup>13</sup> haray kuugal mo kala feepay. Nalaande nden

banginay dun, ko fii yiite ngen fejninooyay ngal, nge ndarndoo kadi noone kuugal mo kala. <sup>14</sup> Si tawii kuugal ngal goddo darni e hoore ndelo ngon tabitii, ontigi hebay njoddi. <sup>15</sup> Si tawii kuugal goddo sumii, haray o fadii, kono kanko tigi o dadiray wa fuutiido yiite.

<sup>16</sup> E on andaa ko onon woni suudu Alla ndun, awa kadi Ruuhu Allaahu on no hodi e mon? <sup>17</sup> Kala bonnudo suudu Alla ndun, Alla bonnay fii makko, ko fii suudu Alla ndun ko hormordu. Awa ko onon woni ndun. <sup>18</sup> Wota gooto d'aynito. Si goddo e mon miijike wonde ko o faamudo e oo aduna fewndiido, haray yo o laato «feetudo» fii yo o wonu faamudo. <sup>19</sup> Ko fii faamu oo aduna ko «feetere» yeeso Alla. Ko fii no windii:

«O nangiray faamube ben yoyreeji mabbe din.»<sup>d</sup>  
<sup>20</sup> No windii kadi:

«Joomiraado on no andi miijooji faamube ben, himo andi kadi ko di meere.»<sup>e</sup>

<sup>21</sup> Awa wota hay gooto mantor yimbe ben. Ko fii fow ko onon jeyi: <sup>22</sup> woni ko Puulusa, woni ko Apoloosi, woni ko Petruusu, woni aduna on, woni ngurndan d'an, woni mayde nden, woni piiji fewndiidi din, woni piiji aroyooji din, fow ko onon wonani. <sup>23</sup> Awa kadi, ko on be Almasiihu on, Almasiihu on kadi ko mo Alla.

## 4

<sup>1</sup> Ko d'un wadi, yo men jogore wa kurkaadi \*Almasiihu on e halfinaabe goongaaji Alla wirniidi din. <sup>2</sup> Awa halfinaabe ben non no toraa wonugol sella-findeebe. <sup>3</sup> Min non

<sup>d</sup> 3:19 3.19 Ayb. 5.13    <sup>e</sup> 3:20 3.20 Zab. 94.11

naawoore nde naawotommi nden e nde yimbe ben naawatammi nden hittaa e an, min tigi toode mi naawitotaako. <sup>4</sup> Ko fii fondo an ngon ko laabungo, fii kala hinaa d'fun hollata ko mi feewudo, naawoowo lan on ko Joomiraado on. <sup>5</sup> Ko d'fun wadi, wota on naawu huunde doo e saa'i on, maa doo e ardu Joomi on, on Weebitoowo ka ndaygu ko suudii kon ka nibe, fenjina ebbooje berde den. Ko fii mantoore mo kala aroyay immorde e Alla.

### *Fii Mawnintinaare be Korenti ben*

<sup>6</sup> Musibbe, mi huutorii dii nooneeji doo fii wadangol on misal e hoore an min e Apoloosi. Ko nii andirton e amen wota mo yawtu ko windii kon, e wota gooto e mon mantor bambindiran-gol. <sup>7</sup> Ko fii ko hombo burnu-maa? E ko hondun jogidaa ko a okkaaka? E si a okkaama, ko fii hondun mantantod'aa, wa si tawii hinaa a okkaado?

<sup>8</sup> Dun-le wuren on haarii, awa kadi on aldfii, on fuddike laamaade e baawo amen! Pellet mi faaleteno hara nun ko on lambe fii menen kadi no men laamodira e mon! <sup>9</sup> Ko fii no wa'animmwi wa si tawii Alla wattirii men, menen \*sahaabaabe ben baawo, wa naawaabe hapanaa wareede e yeeso dental ngal fow, ko fii men wonanii aduna on fow e malaa'ikaabe ben e yimbe ben jalnori. <sup>10</sup> Ko men jogoraabe wa feetube sabu Almasiihu on, kono onon ko on faamube sabu Almasiihu on! Ko men jogoraabe wa lo'ube, kono onon ko on dolnube. Ko on tiddinaabe, kono menen ko men hayfinaabe! <sup>11</sup> Haa jooni meden tampiri heege e donka e

kolngalf e piggal e yiilagol. <sup>12</sup> Meden golliri juude amen d'en tigi haa meden ronki. Tuma men hoynaa woo, men du'anoo. Tuma men cukkaa woo, men wakkiloo. <sup>13</sup> Tuma men no'aa woo, men jaabora no newori. Men woni tuundi oo aduna, men hawkaa e di fow, haa weetaango hande ngoo.

<sup>14</sup> Hinaa fii hersingol on mi windiri d'un, kono mido hajorde on wa faybe an be mi yidi. <sup>15</sup> Ko d'un wadi, hay si on heboyii guluuje sappo ardotoobe on fii no jokkiron laawol Almasiihu on, haray on alaa baabaabe buy. Ko fii, e telen-ma humondiral mon e Iisaa Almasiihu on, ko min wonti baaba mon e nder ko mi fejnninani on Kibaaru Moyyo on kon. <sup>16</sup> Awa mi wakkilinii on yo on wonu nemboofe lan. <sup>17</sup> Ko d'un wadi si mi imminanii on Timotee, on mo tawata ko paykun an mo mi yidi, e sella-findeej e telen-ma Joomiraado on. O andintinay on laawi an din fow e telen-ma Almasiihu on, wano mi janniri di non hen fow e nder \*mofte d'en fow kadi.

<sup>18</sup> Wobbe e mon mawnintinike wa si tawii mi yillitotaako ka mon. <sup>19</sup> Kono mi yahay ka mon ko neebaa, si Joomiraado on jabii. Hinaa kongudi mawnintiniibe ben tun mi andoyta, kono ko bawgal maabbe ngal kadi. <sup>20</sup> Ko fii \*laamu Alla ngun wonaa haalaaji, kono ko bawgal. <sup>21</sup> Ko hondun faaladon? Ko yo mi yaadu ka mon e sawru, kaa ko giggol e newaare?

## 5

### *Fii Hiwugol Moftal ngal*

---

f **4:11** 4.11 Maa: «kolndan».

<sup>1</sup> Awa saa'i woo jiibaare goo no naneede hakkunde mon, hara ko jiibaare nde yi'etaake hay ka be gomdinaa ben, hay goddo e mon no murtini beyngu ben mun! <sup>2</sup> Onon e ndee mawnintinaare mon! Hidon haanunoo yoomude! Suuton on waduso ngal kuugal e hakkunde mon. <sup>3</sup> Min oo mo wondaa e mon ka bandu, kono wonduso e mon ka bernde, mi jaawirii waduso sifa ngal kuugal on toode wa si mido wondi e mon. <sup>4</sup> Awa fewndo mottondirfon e innde Iisaa Joomi on, tawi mido wondi e mon ka bernde, wondude e bawgal Iisaa Joomi men on, <sup>5</sup> yo on nedso accide e Ibuliisa fii no jikku makko junuubankkeejo on halkiree, e fii no ruuhu makko on dandiree pande ardu Joomi men on.

<sup>6</sup> Nden mawnintinaare mon moyyaa. E hara on andaa lewen seeda nii no yurina farin jiibaado fow? <sup>7</sup> Seedee e lewen kidso on, fii no laatoron farin jiibaado keso, bay ko on be aldaa e lewen. Ko fii \*Almasiihu on, ngin baalii men layya fii \*Juldeere Yawtaneede nden, hirsamaa. <sup>8</sup> Awa wota en wadir juldeere nden lewen kidso, maa lewen bonki e bone, kono wadiren nde bireedi laabal e goonga, dfe aldaa e lewen.

<sup>9</sup> Mi windanii on ka nder batakuru an wonde, wota on humondir e jeenoobe ben. <sup>10</sup> Kono hinaa fii mido faalaa wi'ude bee tun selon bee yimbe oo aduna, jeenoobe, maa reeredube, maa jattoobe, maa rewoobe sanamuucci. Si hinaa d'un, haray bee yalton e oo aduna. <sup>11</sup> Ko mi windani on kon jooni, ko wota on humondir e godso wi'udo ko musidso mon e gomfinal, hara ko jeenoowo, maa ndeereero, maa rewoowo sanamu, maa

hoynoowo, maa mandiloowo, maa jattoowo, e hay wota on jaamidu toode e sifa on nedđdo.

<sup>12</sup> Ko fii hondun mi jaawanta be gomdinaa ben? Hinaa onon woni jaawoobe gomdinbe ben? <sup>13</sup> Be gomdinaa ben kan, Alla jaaway be. Awa yaltinee bondo on hakkunde mon.g

## 6

### *Fii Yaafondiral Gomdinbe ben*

<sup>1</sup> Si godđo e mon lurridii e godđo, e hara o suusay wullitaade e be feewaa ben, o acca yimbe Alla ben? <sup>2</sup> E on andaa yimbe Alla ben jaawoyay oo aduna? Si tawii ko onon haani jaawude aduna on, hara on waawataa naawugol haajuuji dī hittaa din? <sup>3</sup> E on andaa en jaawoyay malaa'ikaabe ben? E ko hondun non hadata jaawen haajuuji oo aduna? <sup>4</sup> Awa si tawii hidon mari lurrall hakkunde mon fii haajuuji aduna din, hara ko yimbe be \*moftal ngal hayfini ben wadoton jaawoobe? <sup>5</sup> Ko fii hersingol on mi wowliri fun. Taw si hay gooto faamudo, waawudo jaawude hakkunde musibbe mun alaa hakkunde mon? <sup>6</sup> E hin-le godđo no wullitaade e hoore musidđo mun yeeso be gomdinaa ben!

<sup>7</sup> Onon non, ko ko wadi haa jaawindirfon kon holli wonde on foolama few. Sitta nde wadadfon bone, maa hippadfon. <sup>8</sup> Kono ko onon woni wadude angal peewal ngal, jatta beya, e hin-le ko musibbe mon.

<sup>9</sup> Wota on ddaynito! E on andaa boyliibe ben maraa gebal ka \*laamu Alla? Hinaa jiibiibe ben,

hinaa kadi rewoobe sanamu ben e jeenoobe ben e worbe waditiibe rewbe ben e worbe jinoobe worbe ben <sup>10</sup> e wuybe ben e himmuube ben e mandiloobe ben e hoynoobe ben e jattoobe ben, woni ko mari gebal ka laamu Alla. <sup>11</sup> Awa ko dñun woßbe e mon wonnoo. Kono Ruuhu Alla men on lootii on, \*labbinii on, o jogorii on feewube e innde Iisaa Almasiihu Joomi on.

### *Fii Wodditagol Jinaa*

<sup>12</sup> Mido newnanaa fow, kono hinaa fow nafata. Mido newnanaa fow, kono mi accataa ko woni woo waawammi. <sup>13</sup> Neemaaji dñin ko fii reedu, reedu ndun kadi fii neemaaji dñin, Alla kadi mulay ci fow. Awa kadi bandu ndun hinaa fii jinaa, kono ko ndu fii Joomiraado on, Joomiraado on kadi fii bandu ndun. <sup>14</sup> Awa kadi Alla, on Immintindo Joomi on, immintiniray en bawgal makko ngal. <sup>15</sup> E hara on andaa wonde ko balli mon dñin woni tere \*Almasiihu on? E hara mi yettay tere Almasiihu on, mi yubbindira e cagaajo? Pellet oo'o! <sup>16</sup> E on andaa kadi, mo yubbindiri hoore mun e cagaajo, haray kanko e makko ko be bandu wooturu? Bay no windii: «Kambe dido be wonay gooto.»<sup>h</sup> <sup>17</sup> Kono, on humondirdo e Joomiraado on, haray kanko e makko ko be ruuhu gooto.

<sup>18</sup> Woddfitee jinaa on! E junuubu goo mo neddo wadata, hara on junuubu hinaa tabitoowo ka bandu. Kono on jokkudo jinaa, haray ko bandu makko ndun tigi o woni wadsande junuubu. <sup>19</sup> E hari on andaa dñundoo?

Ko bandu mon ndun woni suudu \*Ruuhu Seniido wondo e mon on, on mo Alla okki on. Hinaa onon jeyi hoore mon,<sup>20</sup> ko fii on sooditaama coggu sattungu. Awa teddiniree Alla balli mon din.

## 7

*Fii Desal e Sunningol*

<sup>1</sup> Jooni feyyen e ko windandon mi kon. No moyyani gorko hara o meemaali debbo. <sup>2</sup> Kono non fii reenagol e jinaa, yo mo kala hebu beyngu, debbo kala heba moodi. <sup>3</sup> Gorko on jonnita beyngu mun ko handi kon, debbo on kadi wano non e telen-ma moodi mun. <sup>4</sup> Ko fii debbo on jeyaa bandu mun ndun, kono ko moodibbo on, gorko on kadi wano non, o jeyaa bandu makko ndun, kono ko beyngu makko jeyi ndu. <sup>5</sup> Wota on salondir, si hinaa e saa'i nanondiral mon, fii no hebiron saa'i no tororon Alla. Bawto d'un yiitidon, fii wota Ibuliisa foolir on angal waawugol hoore mun. <sup>6</sup> Kono mi wowliraali d'un wa si ko yamiroore, kono ko ko newnaa. <sup>7</sup> Mido yelii yo neddo fow wa'u wa an min, kono mo kala no mari dokkal feerewal, ngal Alla yedi d'un, mo kala e noone goo.

<sup>8</sup> Be resaa ben non e keynguuße ben, mi wi'ay no moyyani be no be wa'ira wa an min. <sup>9</sup> Kono si be waawataa hoore mabbe, ko yo be resu, ko fii ko resugol buri bittorgol faale feyyitudo. <sup>10</sup> E telen-ma yettindirbe ben non, e hino ko mi wi'ata kon, (hinaa non min yamiri, kono ko Joomiraafdo on), wota debbo sertu e moodi mun. <sup>11</sup> Si kanko debbo on non o aru e serteede, yo

o joodo hara o yettaaka, maa o moyyintinida e moodi makko. Awa kadi wota gorko jonnitu beyngu mun.

<sup>12</sup> Fii beya, (fundoo ko min wowli, hinaa Joomiraado on), si musicdo goo no mari debbo mo gomdinaa, hara on debbo no yidi wondugol e makko, wota o seedu e makko. <sup>13</sup> Si tawii kadi debbo no mari moodibbo mo gomdinaa, hara on gorko no yidi wondunde e on debbo, wota o seedu e moodi makko. <sup>14</sup> Ko fii moodibbo mo gomdinaa ko jeyaado Alla sabu debbo makko gomdindo on, debbo mo gomdinaa on kadi ko jeyaado Alla sabu moodibbo makko gomdindo on. Si hinaa d'un, bibbe mon ben wonay woddondirbe e Alla, e hara-le wurin ko be badondirbe e Alla. <sup>15</sup> Si tawii mo gomdinaa on no catii e seedugol, yo gomdindo on newnan mo d'un. Ko fii hay huunde waddaaki musicdo gomdindo e d'un, Alla ko noddiri en ko wuurugol e nder buttu. <sup>16</sup> E hoore d'un, ko honno debbo andirta si o danday moodi makko? Maa si gorko danday beyngu mun?

<sup>17</sup> Ko woni tun, yo mo kala jokkir no Joomiraado on wadsirani d'un non, e noone noddaandu ndu o hebiri Alla ndun. Ko nii mi yamiriri e nder \*mofte den fow. <sup>18</sup> On mo noddeede mun tawi sunninaama, yo o wonir no o sunniniraa non. On mo noddeede mun tawi sunninaaka, wota o eto sunnineede. <sup>19</sup> Sunninegol\* ngol wonaa huunde, angal sunninegol kadi wonaa huunde, kono ko doftagol yamirooje Alla den woni godsfun. <sup>20</sup> Yo mo kala wonir no wonirnoo non fewndo o noddaa. <sup>21</sup> Si tawii fewndo

noddadaa ko a jiyaado, wota a aanu, kono si tawii hida waawi rinfude, haray eto. <sup>22</sup> Ko fii jiyaado mo Joomiraado on noddii, haray o wonii mo Joomiraado on rindini. Ko wano non kadi, dimo mo Joomiraado on noddii, haray o wonii jiyaado \*Almasiihu on. <sup>23</sup> Awa on sottiraama coggu sattungu, wota on wontu maccube yimbe ben. <sup>24</sup> Yo mo kala, yo musibbe, woniran Alla noone no wonirnoo non wa fewndo ko o noddaa.

<sup>25</sup> E telen-ma be yettaali yettaaka ben, wonaa yamiroore Joomiraado on mi hendii. Kono ko fewjoore an nden mi woni on jonnude, wa neddo sella-findeejo sabu yurmeende Joomiraado on. <sup>26</sup> E hino ko mi miji no moyyi kon, sabu satteendeeji fewndiidi cin: no moyyani neddo ka o wonira no o woniri non. <sup>27</sup> Si hida tigguno, wota a dabbu seedigal. Si a tiggaa, wota a dabbu tiggugol. <sup>28</sup> Kono, si a resii, haray a wadaali junuubu. Si jiwu kadi resaama, haray o wadaali junuubu. Kono non yimbe resindirbe ben fottay e tampereeji, mi faalaa on dandude di.

<sup>29</sup> E hino ko mi wi'ata kon, yo musibbe an: saa'i on ko rabbidudo. Jooni, on mo no mari suddiido, yo wa'u wa mo alaa. <sup>30</sup> Ben wonbe wullude, yo wa'u wa si be alaano wullude. Ben wonbe kadi weltaade, yo wa'u kadi wa si be alaano weltaade. Soodoobe ben kadi, yo wa'u wa si be maraano, <sup>31</sup> e ben wonbe huutorde oo aduna, ka haqiiqa, yo wa'u wa si tawii be alaano huutorde. Ko fii mbaadi oo aduna feyyay.

<sup>32</sup> E hin-le mi faalaaka yo on wondu e annde. On mo tiggaali, ko fii haajuuji Joomiraado on hittini, no o weltinira Joomiraado on. <sup>33</sup> On

resudo non, ko fii haajuuji aduna hittini, no o weltinira beyngu makko. <sup>34</sup> Haray himo senditii. Wano non, debbo mo resaaka maa jiwo, ko fii Joomiraado on hittini, fii no o laatora laabudo ka bandu e ka ruuhu. Debbo resaado on non ko fii haajuuji oo aduna hittini, no o weltinira moodi makko. <sup>35</sup> Ko nafa mon mi wowliri d'un, hinaa fii faadfinangol on, kono ko fii addugol on e ko haani kon e ko laabi kon, e no humoron e Joomiraado on, hara on dillaali.

<sup>36</sup> On mo no tanyinii ko lo'udo e fee jiwo mo o yami, feyyudo duubi kellefuyee, o tawi yettindirgol e makko no moyyi, yo o wadu ko o faalaa kon, haray o wadfaali junuubu si be resindirii. <sup>37</sup> Kono on anniyiido ka bernde mun haa tabiti wonde o tiggataa on jiwo, hara ko e yidi makko kanko tigi, e hoore himo wawti faaleeji makko, haray o wadii ko moyyi. <sup>38</sup> Awa ko nii woniri: on tiggudo jiwo mo o yami on, haray o wadii ko moyyi, on mo tiggaali jiwo mo o yamaynoodi on kadi, burtu moyyinde.

<sup>39</sup> Debbo no humondiri e moodi mun fannin moodi makko no wuuri. Kono si gorko on maayii, haray no newanii mo reseede ka o faalaa woo, ko woni tun, ko yo taw ko no yaadiri e faale Joomiraado on. <sup>40</sup> E miijo an, ka o burata hettaade, ko si o wonirii wano o woniri non, bay min kadi mido tanyinii Ruuhu Allaahu on no e an.

## 8

*Fii Naamugol Tebbeeli Sakkanaadi Sanamuuji*

<sup>1</sup> E telen-ma tebbeeli sakkanaadi sanamuaji, hiden andi wonde en fow hidēn mari gandal, e hin-le gandal adday mawnintinaare, kono giggol tiidinay. <sup>2</sup> On mo no sikki no andi godfun, haray fahin o andaali ko honno haanaa andireede. <sup>3</sup> Kono si goddo yidii Alla, haray Alla no andi mo. <sup>4</sup> Fii telen-ma huutorgol tebbeeli sakkanaadi sanamuaji din, hiden andi wonde sanamu wonaa godfun tigi e oo aduna, ko Alla gooto tun woodi. <sup>5</sup> Pellet no woodi piiji reweteedi duudsudi ka kammu e ka leydi, jogoraadi wa si tawii ko allaabe maa joomiraabe. <sup>6</sup> Kono enen ko Alla gooto marden, on Baabaajo, on mo kala huunde iwri e mun, e on mo wonanden, e Joomi gooto, d'un ko Iisaa Almasiihu on, on mo piiji din fow woniri, e on mo wonirdsen.

<sup>7</sup> Kono fow alaa ngal gandal. Ko d'un wadi, ben wowtube sanamuaji, haa jooni si no jaamude ngun teewu anditay fii ko sakkaa kon. Nde tawnoo bernde mabbe nden no lo'i, d'un tuuinay be. <sup>8</sup> Hinaa neema bannata en e Alla. Si en naamaali, d'un duytataa en huunde, si en jaamii kadi, d'un beydataa en huunde.

<sup>9</sup> Ko woni tun, reenee fii wota ko newnanadson wadugol kon wonan lo'ube ben peggal. <sup>10</sup> Ko fii si goddo aru e yi'ude ma, an oo jooma gandal, hida nafoo e nder juulirde ka sanamuaji rewetee, taw si nden bernde makko lo'unde poodataa mo jaamugol tebbeeli sakkanaadi sanamuaji? <sup>11</sup> Dun haray on lo'udo mulirii sabu «gandal» maa ngal, d'un ko on musiddo mo \*Almasiihu on maayi fii mun! <sup>12</sup> Si on wadirii non junuubu e telen-ma musibbe ben, e nder barmingol bernde

mabbe lo'unde nden, haray on wadii junuubu e telen-ma Almasiihu on. <sup>13</sup> Ko dfun wadi, si tawii jaametee wonay sabu peggal musiddo an, haray mi jaamataa teewu hande kadi, fii wota mi libu musiddo an on.

## 9

### *Fii ko Haanani Sahaabaajo*

<sup>1</sup> E hara hinaa mi dimo? Kaa hinaa mi \*sahaabaajo? Kaa mi yi'aali Iisaa Joomi men on? Kaa hinaa on kuugal an e telen-ma Joomi on? <sup>2</sup> Hay si tawii hinaa mi sahaabaajo fii wobbe ben, onon bete ko mi sahaabaajo fii mon. Ko fii ko on maande sahaabankaaku an ngun e telen-ma Joomi on.

<sup>3</sup> E hino doo ko mi jaaborta jaawoobe lan ben kon: <sup>4</sup> E hara haananaa men ka men jaama men yara? <sup>5</sup> Kaa haananaa men ka men yaada e debbo amen mo men kafidi diina, wano beya sahaabaabe woni warrude non, e musibbe Joomi men on, e Petruusu? <sup>6</sup> Kaa ko min tun e Barnabaasi haani gollude fii no men wuuriira? <sup>7</sup> Ko suufaajo hombo fawtotoo hoore mun e nder suufayaagal mun? Ko hombo tutata leggal \*wiiju, hara jaamataa bibbe maggal on? Ko ngaynaako hombo aynata wuro, ronka yarude biraadfan din daabeeji?

<sup>8</sup> Ko mi wowlata kon wonaa ko iwri e miijooji neddanke, ko fii Sariya on kadi ko dfun wi'i. <sup>9</sup> Ko fii no windii ka Sariya Muusaa: «Wota mo buuma hunduko ngaari ndin nde hindi yaabana

dun maaro.»<sup>i</sup> E hara Alla no aanidi e ga'i din?  
 10 Kaa ko fii men o wowlirani nii? Hiiyii, ko sabu men enen dun windiraa. Mo no remude yo remir tama'u, e on mo no yaabude yo yaabir tama'u hebugol gebal. 11 Si tawii men aawii ko iwri e Alla hakkunde mon, taw si haanaa ka men sonita e mon piiji aduna? 12 Si tawii dun no haanani wobbe goo e hoore mon, haray menen ittii e sikke.

Kono men huutoraali kon ko haanani men. Kono meden ronditii fow, fii wota men fallu Kibaaru Mooyo \*Almasiihu on. 13 E on andaa wonde ben wadoobe golle \*juulirde mawnde nden ko e dun naamata, e wonde golloobe ka \*layyorde ben kadi no mari gebal ka layyorde? 14 Ko wano non kadi Joomi on no yamiri wonde fejninoobe Kibaaru Mooyo on ko e makko wuurata.

15 Min non mi huutoraali hay huunde e din haanandi lan, awa mi windiraali dun kadi fii yo mi newnane. Ko fii mayde nden no buranimmi edii godso ittude lan e ndee huunde nde mi mawninorta. 16 Ko fii hewtaa ka mi mantora yottingol Kibaaru Mooyo on, bay dun ko ko wadsii mi. Si mi fejninaali Kibaaru Mooyo on, bone wonanay lan. 17 Si tawii ko e hoore anniye mi woni wadfirde, haray mido mari njoddi. Si tawii non mi fawa wadugol dun, haray mi wadsay woni golle de mi halfinaa. 18 Awa ko hondun non jooni woni njoddi an ndin? Ko waajagol fii Kibaaru Mooyo on e baawo yantugol njoddi e tortagol ko haanani waajotoofo kon.

---

<sup>i</sup> 9:9 9.9 Yaj. 25.4

<sup>19</sup> Ko ffi, ffi kala mido rindi e hoore wondo woo, mi waditii maccudo fow ffi no adadu burdo mawnude on hebora. <sup>20</sup> E telen-ma Yahuudiyankeebe ben, mi wa'a wa Yahuudiyankeejo, ffi no mi hebira Yahuudiyankeebe ben. E telen-ma wonbe e ley Sariya on kadi, mi wa'a wa wondo e ley Sariya on, ffi no mi hebira wonbe e ley Sariya on ben, ffi kala min tigi hinaa mi wondo e ley Sariya on. <sup>21</sup> E telen-ma be alaa e ley Sariya on ben kadi, mi wa'a wa mo alaa e ley Sariya on, ffi no mi hebira be alaa e ley Sariya on ben, e hinle min tigi wonaa wonde mi alaa e ley Sariya Alla on, kono mido e ley Sariya Almasiihu on. <sup>22</sup> Mi lo'ida e lo'ube ben ffi no mi hebira lo'ube ben. Mi wonii fow e telen-ma yimbe ben fow, ffi no gasirta woo mi wona sabu dandugol wobbe. <sup>23</sup> Mi wadiri fow sabu Kibaaru Moyyo on, ffi no mi hebiroya gebal.

<sup>24</sup> E on andaa? Wonbe foolotirde e dogudu ben fow no dogude, kono ko gooto foolata heba njoddi. Awa dogiree wano non, ffi no hebiron njoddi. <sup>25</sup> Kala foolotirteedo waday kala noone eltal bandu, ffi no o hebira \*meetelol ngol luttataa, kono enen ko meetelol luttoowol. <sup>26</sup> Min non mido dogude, kono hinaa dogudu meereeru. Mido uttaade, kono hinaa ffi uttagol hendu ndun. <sup>27</sup> Liddu d'un on non, mido yangude bandu an ndun, mido waawi ndu, ffi nde mi gaynoyi waajaade beya, min tigi wota mi pottine.

## 10

*Mise Yettaade e Taariika Isra'iilayankeebe*

*ben*

<sup>1</sup> Musibbe an, mi faalaaka yo on yejjitu wonde baabiraabe men ben fow wonno e ley duulere, be fow be tayitiri ka baharu. <sup>2</sup> Be fow be lootaa maande gomfinal ka duulere e ka baharu e nder humondiral e Muusaa. <sup>3</sup> Be fow be jaami jaametee gooto iwrudo e Alla. <sup>4</sup> Be fow be yari njaram gootan iwrudan e Alla, ko fii ko e fetere iwrunde e Alla jokkunoonde be nden be yaraynood. Ko Almasiihu on wonnood be nden fetere. <sup>5</sup> Kono burbe ben e mabbe weltinaano Alla, ko dun wadi si be maayi ka wulaa.

<sup>6</sup> Awa dfun fow ko wadiri ko fii hollugol en mise, fii wota en hebu faaleeji bondi wano be hebirnood non. <sup>7</sup> Wota on wonu rewoobe sanamu, wano wobbe wonirnood e hakkunde mabbe, wano windori non: «Jamaa on joodii fii jaamugol e fii yarugol, bawto dfun be immii fii fijrgol jiibaare.»j <sup>8</sup> Awa wota en jokku jinnaa, wano wobbe e mabbe wadfirnood non, haa guluuje noogay e tato maayi jaande wootere. <sup>9</sup> Wota en ndarndo \*Almasiihu on, wano wobbe e mabbe ndarndornood non, ben be bolle mulunood. <sup>10</sup> Wota on ñermu, wano beya ñermirnood non, ben be malaa'ikaajo muloowo on warunood.

<sup>11</sup> Dun, ko hebiri be ko fii yo wonan en misal, windiraa kadi fii hajagol en, enen bee tawaabe ka lannoode aduna. <sup>12</sup> Ko dfun wadi, on mo no sikki no darii, yo o reeno wota o yanu. <sup>13</sup> Ndarndannde woo hebaali on nde goddo goo hebaali. Alla ko Sella-Findiejo, o newnataa ndarndedon toonin doole mon den, kono e nder

ndarndannde nden o adday feere no sortoron e mun, e no waawiron nde dartorde.

<sup>14</sup> Ko cfun wadi, yo yibbe an, dogee rewugol sanamu. <sup>15</sup> Ko wa yimbe faamube mi woni on yewtirde, onon tigi jaawee ko mi wi'i kon. <sup>16</sup> Jardukun du'aa kun wonden du'orde kun ko yubbondirkun e yiiyan Almasiihu on. Bireedi mo wonden tayitude on, ko yubbondirdo e bandu Almasiihu on. <sup>17</sup> Bay ko bireediwal gootal woodi, enen e dzuufude men ko en bandu wooturu. Ko fii en fow hisen hawti bireediwal gootal.

<sup>18</sup> Ndaaree bee \*Isra'iilayankeebe wonbe naamude daabeeji sakkaadi din. Hinaa yubbondirbe e \*layyorde nden? <sup>19</sup> Awa ko hondun mi woni wi'ude? Wonde tebbeeli sakkaadi fii sanamuaji din ko godfun? Kaa sanamuuru ko godfun? Oo'o! <sup>20</sup> Kono kon ko rewoobe sanamuaji ben woni sakkaade, ko jinnaaji din be woni sakkanaade, hinaa Alla. E hin-le mi faalaaka yo on humondir e jinnaaji din. <sup>21</sup> On waawataa yarirde jardukun Joomi on, yariron kadi jardukun jinnaaji din. On waawataa hebude ka naametee Joomi on, hebon kadi ka naametee jinnaaji din. <sup>22</sup> En faalaa memminde nawliigu Joomiraado on? Kaa en buru mo dolnude?

### *Fii Hettaare Wonanne Gomfindo on*

<sup>23</sup> Fow no newnaa, kono hinaa fow wondi e nafa. Fow no newnaa, kono hinaa fow tiidsinta. <sup>24</sup> Wota gooto dabbu nafa mun on, kono yo dabbu fii heddiibe ben.

<sup>25</sup> Naamee kala teewu ko yeeyetee ka luumo, hara on sikkitaaki ka bernde mon. <sup>26</sup> Ko fii: «Leydi ndin e kala ko ndi wondi ko Joomiraado on wonani.»<sup>k</sup>

<sup>27</sup> Si tawii mo gomfinaa saatinii on, e hin-le hidon faalaa yahude, naamee kala ko weebitanoyadon, hara on sikkitaaki ka bernde mon. <sup>28</sup> Kono si godso wi'ii on: «Dundoo ko ko ittaa sadaka», haray wota on naamu sabu on andindo on e sabu bernde nden. <sup>29</sup> Hinaa fii bernde mon nden mi woni yewtude doo, kono ko fii bernde oya nden. Awa ko fii hondun ndimankaaku an ngun naawirtee bernde oya nden? <sup>30</sup> Si mi jarnii Alla e nder ko mi naamata kon, haray ko hondun mi felirtee fii on naamete mo mi jarni Alla fii mun?

<sup>31</sup> Woni on naamay, woni on yaray, woni kala ko wadoton, wadfiree piiji din fow fii mangu Alla ngun. <sup>32</sup> Wota on wonan hay gooto peggal, woni \*Gereekiyankeeben, woni Yahuudiyankeeben, woni \*moftal Alla ngal. <sup>33</sup> Wano mi woniri weloowo wondo woo e di fow non, mi alaa dabbude nafa an on, kono ko nafa burbe duudude ben fii no be dandiree.

## 11

<sup>1</sup> Awa nembee lan, wano min kadi mi woni nembirde \*Almasiihu on non.

*Fii no Goddo Haani Wonirde e nder Rewugol Alla*

<sup>2</sup> Mi mantii on fii ko on yejjitali fii an kon e di fow, e ko maanditidon janndeeji din kon,

---

k **10:26** 10.26 Zab. 24.1

wano mi hewtiniri on di non. <sup>3</sup> Ko d'un wadi si mido faalaa yo on andu wonde Almasiihu on ko hooreejo kala nedfanke, gorko kadi ko hooreejo e fee beyngu mun, Alla kadi ko hooreejo e fee Almasiihu on. <sup>4</sup> Kala gorko hippido kufune, nde no toroo Alla, maa no haala ko Alla longini d'un, haray o yawike hoore makkon. <sup>5</sup> Ko wano non kadi, kala debbo wondo toraade Alla maa haalude ko Alla longini d'un, hara o taaraa, haray o yawike hoore makkon. Haray no wa'i wa si tawii kanko debbo on himo fembii. <sup>6</sup> Ko fii, si debbo taaraa, haray yo o tayu sukundu makko ndun. Ko fii, si no hersinanii debbo ka sukundu makko ndun tayee, maa o femboo, haray yo o tiggo. <sup>7</sup> Kono duhiido haanaa ka hippoo, ko fii ko o mbaadi e darja Alla, debbo non ko darja gorko. <sup>8</sup> Ko d'un wadi, gorko hinaa e debbo suutaa, kono ko debbo suutaa e gorko. <sup>9</sup> Awa kadi gorko hinaa sabu debbo tagiraa, kono debbo ko sabu gorko tagiraa. <sup>10</sup> Ko d'un wadi, sabu malaa'ikaabe ben, debbo no haani hebude ka hoore mun maande laamu ngu o woni e ley mun ngun. <sup>11</sup> Kono e telen-ma humondiral men e Joomiraado on, debbo gasataa e baawo gorko, gorko kadi gasataa e baawo debbo. <sup>12</sup> Ko fii, ko wano debbo suutiraa e gorko non, ko wano non kadi tawi ko debbo danata gorko, d'un fow non ko immorde e Alla.

<sup>13</sup> Naawee d'un onon tigi. E hara no hawri ka debbo toroo Alla, hara o taaraa? <sup>14</sup> E hara aduna on tigi faaminaali on wonde no hersinanii gorko ka o accita saayannde? <sup>15</sup> Kono hebugol

---

m **11:4** 11.4 Maa: «*o yawike hooreejo makko on*». n **11:5** 11.5 Maa: «*o yawike hooreejo makko on*».

sukundu ko darja debbo, ko fii sukundu ndu o yedaa ndun ko ko o buumora. <sup>16</sup> Si tawii goddo no faalaa warrude noone goo, enen en alaa on naamu, \*mofte Alla den kadi alaa on naamu.

*Fii Nafakkaari Joomi on  
(Mat. 26.26-29; Mrk. 14.22-25; Luk. 22.15-20)*

<sup>17</sup> E nder wadfugol non dee yamirooje yeeso doo, alaa ko mi mantira on e nder ko mottondirton kon, hara hinaa fii ko buri moyyude, kono ko fii ko buri bonude. <sup>18</sup> Ko adii kon non, mi nanii nde mottondirdon woo sendondiral waday hakkunde mon. E banje goo, d'un no henanimmi. <sup>19</sup> Bee yeddondire wona hakkunde mon, fii no holniibe ben feenira e hakkunde mon. <sup>20</sup> Jaka nde mottondirdon woo, hinaa fii naamugol \*nafakkaari Joomi on. <sup>21</sup> Bay nde hidon jaama, mo kala kutoto nafakka mun on, jaama, hara goddo goo no weelaa, oya kajun no mandili. <sup>22</sup> E hara on alaa cuudi ka jaamon e ka yaron? Kaa on hayfinay woni moftal Alla ngal, hersinon be alaa huunde ben? Ko hondun mi wi'ata on? Mi mantay on? Mi mantataa on e d'un!

<sup>23</sup> Ko fii, ko ko mi hebiri Joomi on kon mi hewtini on. E nder jemma mo Iisaa Joomi on janfaa e mun on, o yettuno bireedi, <sup>24</sup> o jarni Alla, o tayiti, o wi'i: «Dundoo ko bandu an, wonandu on ndun nii, wadsee dundoo maande ko anditiron fii an.» <sup>25</sup> Ko wano non kadi, bay be gaynii jaamude, o yetti jardukun wadorkun njaram, o wi'i: «Kun jardukun ko maande fii \*ahadi heyri tippundi e yiiyan an dan, wadsee dundoo maande ko anditiron fii an, saa'i nde

yaroton e mun woo.» <sup>26</sup> Ko fii nde jaamoton oo bireedi woo, yaron e kun jardukun, on wowlay fii mayde Joomi on haa nande o artoyi.

<sup>27</sup> Ko dñun wadi, kala on jaamudo on bireedi, yari e kun jardukun Joomi on, hara ko no haaniraa, o wonay felnido e telen-ma bandu e yiyan Joomi on. <sup>28</sup> Awa, yo mo kala miijitano hoore mun si o jaama on bireedi, maa o yarira kun jardukun. <sup>29</sup> Ko fii kala on jaamudo yari e baawo anditugol bandu Joomi on, haray ontigi jaamii yarii jaawoore jaawaynde dñun kapun tigi. <sup>30</sup> Ko dñun wadi si no e hakkunde mon nawnuþe buy e kitasoloþe buy, e on mayraama wobbe. <sup>31</sup> Si enen tigi en jaawitike, en jaawoytaake. <sup>32</sup> Kono Joomiraado on no jaawude en donkina, fii wota en jaawidoye e aduna on. <sup>33</sup> Ko dñun wadi, yo musibbe an, nde mottondirdson fii nafakkaari ndin woo, habbondiree. <sup>34</sup> On mo tawi no weelaa, yo jaamu ka mun, fii wota on mottondir fawon jaawoore e hoore mon.

Mi jaaboyto deya lande, nde mi hewtoyi.

## 12

### *Fii Dokke Ruuhu Seniido on*

<sup>1</sup> E telen-ma dokke iwrude e Ruuhu Alla ðen, yo musibbe an, mi faalaaka yo on ronku andude dñun. <sup>2</sup> Hidon andi fewndo ko on gomdfinaa, hidon selnaa, nawraa e sanamuucci mbobooji. <sup>3</sup> Ko dñun wadi si mi wi'ay on: kala mo Ruuhu Allaahu on ardi e nder ko o wowlata kon, wi'ataa: «Iisaa ko hudaado.» Hay gooto kadi

waawataa wi'ude: «Iisaa ko Joomi», si hinaa \*Ruuhu Seniido on ardii mo.

<sup>4</sup> Dokke den no serti, kono Ruuhu Allaahu on ko gooto. <sup>5</sup> Balle den kadi no serti, kono Joomiraado on ko gooto. <sup>6</sup> Golleeji din kadi no serti, kono ko Alla gooto on woni wadfude dii fow e yimbe ben fow.

<sup>7</sup> E hin-le, mo kala ko Ruuhu Allaahu on fejjini e mun kon ko dokkal fii nafa fow. <sup>8</sup> Ko d'un wadi, Ruuhu on yeday goddo on kongol faamu, on Ruuhu gooto yeda oya on kongol gandal, <sup>9</sup> on Ruuhu gooto yeda goddo goo gomfinal, on Ruuhu tigi yeda goddo goo jawndugol, <sup>10</sup> goddo goo dokkal fii wadugol kaawakeeji moyyi, goddo goo haalugol ko Alla longini d'un, goddo goo gandal fii sendindirgol noone ruuhuji, goddo goo noone \*haalaaji janani, goddo goo nantingol din haalaaji. <sup>11</sup> Ko on Ruuhu gooto bajjo wadata dii piiji fow, senditana mo kala e ko mun, wano o yidiri non.

<sup>12</sup> Ko d'un wadi, wano tawiri non bandu ndun ko wooturu, hindu mari tere buy. Tere bandu ndun non kadi e duudfude, ko bandu wooturu de mari. Ko wano non wonirani \*Almasiihu on. <sup>13</sup> Ko fii ko Ruuhu gooto \*lootiraden fii wonugol bandu wooturu. En fow yarnaaden Ruuhu Alla gooto on, woni non Yahuudiyankeebe ben, woni \*Gereekiyankeebe ben, woni jiyaabe ben, woni rimbe ben.

<sup>14</sup> Ko fii bandu ndun wonaali teral gootal, kono tere buy. <sup>15</sup> Si koysgal ngal wi'ii wonde: «Bay hinaa mi jungo, mi tawdaaka e bandu ndun», d'un ittataa ko ngal teral e bandu ndun.

<sup>16</sup> Si nowru ndun kadi wi'ii wonde: «Bay hinaa mi yiitere, mi tawdaaka e bandu ndun», d'un ittataa ko ndu teral e bandu ndun. <sup>17</sup> Si tawno bandu ndun fow wonno yiitere, ko honno ndu naniraynood? Maa si bandu ndun fow wadano nowru, ko honno ndu faamiraynood barngol? <sup>18</sup> Kono Alla wadi teral kala e bandu ndun no o faaliraa non. <sup>19</sup> Si fow wonno teral gootal, ko honto bandu ndun wonaynood? <sup>20</sup> Jooni non, tere buy no woodi, kono bandu ndun ko wooturu.

<sup>21</sup> Yiitere nden waawataa wi'ude jungo ngon: «Mi hatonjinaa e maa.» Hoore nden kadi waawataa wi'ude koyde ñen: «Mi hatonjinaa e mon.» <sup>22</sup> Dun-le toode, tere bandu wa'ude wa si no buri lo'ude ñen, ko ñen woni hittude, <sup>23</sup> e de tanyiniden no buri hayfude ñen e bandu ndun, hidien hundiri cfe teddungal burngal tiidude. E hin-le tere men burde hersinaade ñen, ko ñen burden surrude, <sup>24</sup> de hersinaaki ñen kan hatonjinaa e d'un. Alla wadiri bandu ndun e noone mo bureten teddinirde ñakkiraade ñen, <sup>25</sup> fii wota liddondiral wadu e nder bandu ndun, kono yo de nafindir. <sup>26</sup> Si teral tampii, ñeuya tere fow tampilay e maggol. Si teral gootal teddinaama, ñeuya tere fow weltoday e maggol.

<sup>27</sup> Ko on bandu Almasiihu on, mo kala e mon ko teral e mayru. <sup>28</sup> Awa, ko Alla adii wadude e nder \*moftal ngal, ko \*sahaabaabe, dimmun d'un ko haaloobe ko Alla longini d'un, tammun d'un ko jannoobe, bawto d'un dokkal fii kaawakeeji moyyi, e dokke fii pawndugol, e wallugol, e ardagol, e wowlugol e noone haalaaji janani. <sup>29</sup> Hara fow ko sahaabaabe? Kaa hara

fow ko haaloobe ko Alla longini d'un? Kaa hara fow ko jannoobe? Kaa hara fow wad'ay kaawakeeji moyyi? <sup>30</sup> Kaa hara fow yeda dokke nawndugol? Kaa ko fow yedaa wowlugol e haalaaji janani? Kaa hara fow ko nantinoobe din haalaaji? <sup>31</sup> Kono himmanee dokke burde moyyude den. Awa mi hollay on kadi laawol burngol moyyude ngol.

## 13

### *Fii Giggol*

<sup>1</sup> Hay si mi wowlia e haalaaji yimbe ben e di malaa'ikaabe ben, si tawii mi alaa giggol, haray ko mi talenhun sila senyoohun, maa foolifen wondo e iidude. <sup>2</sup> Hay si mi yedaama dokkal haalugol ko Alla longinimmi kon e faamu fii gundooji din fow e gande den fow, e hay si mi hebii gomdfinal haa ka tawata mi dillinay pelle den, si tawii mi alaa giggol, haray hinaa mi fus. <sup>3</sup> Hay si mi okkitirii keyeeji an din fow fii nammingol miskinbe ben, e hay si mi okkitirii bandu an ndun fii yo ndu sunne, si mi alaa giggol, d'un nafataa lan huunde.

<sup>4</sup> Giggol ko munjal, giggol ko moyyuki, giggol nawlataa, giggol mantotaako, hinaa heewungol mawnintinaare. <sup>5</sup> Ngol waasaa needi, ngol daabbaataa nafa maggol, ngol yaawataa seytinde, ngol marataa bone. <sup>6</sup> Ngol weltortaa angal peewal, kono ko goonga ngol weltorta. <sup>7</sup> Giggol hejnay ko woni woo, hingol hoolii ko woni woo, hingol tanyinii e ko woni woo, hingol wakkili ko woni woo.

<sup>8</sup> Giggol ngol lannataa haa poomaa. Haalugol ko Alla longini d'un feyyay, \*haalaaji janani kadi feyyay, gandal kadi feyyay. <sup>9</sup> Ko fii gandal men ngal hinaa timmungal, ko haaleten kon e nder ko Alla longini en kon kadi hinaa ko timmi. <sup>10</sup> Ko fii, nde ko laatii kon aroyi woo, ko timmaa kon feyyay. <sup>11</sup> Wa fewndo ko mi wonnoo paykun, mi wowlirayno wa paykun, mi miijorayno wa paykun, mi naawirayno kadi wa paykun. Bay mi wonii mokobaa, mi feyyani paykunyaagal. <sup>12</sup> Hande hidsen tintora ndaarorgal e noone no nibbitiri, kono en yi'oyay kene e kene. Ko mi andi kon hande timmaa, kono mi andiroay wano Alla andirimmi non. <sup>13</sup> Jooni non ko dii piiji d'soo tati luttata: ko gomfinal e tama'u e giggol. Kono ko buri mawnude kon, ko giggol.

## 14

### *Fii Dokke e Longineede noone Haalaaji*

<sup>1</sup> Awa dabbee giggol ngol, himmanon dokke iwrude e Ruuhu Alla den, tentinii haalugol ko Alla longini d'un. <sup>2</sup> Dun, on wowlufo e \*haala janana, haray hinaa yimbe ben o wowlani, ko Alla. Ko fii hay gooto alaa mo faamude, awa kadi ko ruuhu o woni wowlirde din gundooji. <sup>3</sup> Kono haaloowo ko Alla longini d'un kon ko yimbe ben o woni yewtude, o tiidina be, o wakkilina be, o yarlina be. <sup>4</sup> On wowloowo e haala janana non ko hoore mun tun o woni tiidinde, kono wondo haalude ko Alla longini d'un kon kajun ko \*moftal ngal o woni tiidinde. <sup>5</sup> Mido yidi on fow yo on wowlu e haala janana, kono ko

mi buri faaleede kon ko yo on wonu haaloobe ko Alla longini dfun. Ko fii on haaloowo ko Alla longini dun no buri wowloowo e haalaaji janani on mawnude, si hinaa hara on neddo nantin d'un fii no moftal ngal tiidiniree.

<sup>6</sup> Jooni non, yo musibbe an, si mi arii ka mon e yewtugol on e haalaaji janani, haray ko hondun mi nafi on, si wonaa hara ko kongol gandal maa jannde maa haalugol ko Alla longini dfun maa fejpinannde mi woni wowlude? <sup>7</sup> Si tawii aalaaji dfi wuuraa no wadude hito, wano serdu maa hoddu, si hito majji on laabaali, haray ko honno andirton galli majji on? <sup>8</sup> E si tawii hito \*liital ngal laabaali, ko hombo ebbindantoo hare nden? <sup>9</sup> Onon kadi wano non, si tawii on alaa yewtude haala faamotooka e nder ko wowloton e haalaaji janani kon, ko honno be andirta ko wondon wi'ude kon? Ko fii haray ko hendi ndun wondon wowlande. <sup>10</sup> Noone haalaaji buy no woodi e oo aduna, kono alaa e majji ngol alaa firo. <sup>11</sup> Si tawii non mi faamataa haala ka godso woni yewtude lan kan, mi wonanay mo janano, kanko kadi o wonanammi janano. <sup>12</sup> Onon kadi non, bay hidon himmande dokke iwrude e Ruuhu Alla den, yo taw ko fii tiidengol moftal ngal wondon himmirande den dokke haa feyyita.

<sup>13</sup> Ko dfun wadi, on wondo yewtude e \*haala janana longinaaka, yo toro fii no waawira nantinirde. <sup>14</sup> Ko fii si mido toraade Alla e haala janana longinaaka, haray ruuhu an on no toraade, kono haray mi alaa faamude. <sup>15</sup> Awa ko hondun mi wadata? Haray yo mi toror ruuhu, kono yo mi toror kadi faamu, mi beytira ruuhu,

kono mi beytira kadi faamu. <sup>16</sup> Si hinaa d'un, si a mantirii Alla ruuhu on, ko honno joodiido tun e hakkunde hedotoobe ben jabirta «aamiina» e nder ko wondaa jarnude kon, bay o andaa ko hondun wondaa wi'ude? <sup>17</sup> Ko goonga, hid'a jarnirde no moyyiri, kono a tiifinaali oya.

<sup>18</sup> Mi jarnii Alla ko tawi kon mido wowlude e haalaaji janani buri on on fow. <sup>19</sup> Kono ka nder moftal, ko haalirgol hakkille an d'en kongudi jowi jannaydi beya buranimm'i haalugol kongudi gu-luuji sappo e haala janana. <sup>20</sup> Musibbe an, wota on miiyor wa paykoy. E telen-ma ka bone, wonee paykoy tosokoy, kono miijoron wa mokobaabe. <sup>21</sup> Ko fii no windii ka Sariya, Joomiraado on no daali:

«Ko yimbe be haalaaji janani  
e be kundule janane  
mi wowliranoya oo jamaa.

Hay d'un be hedoytaako lan.»<sup>n</sup>

<sup>22</sup> Awa, haalaaji janani din ko maande fii be gomdfinaa ben, hinaa fii gomdfinbe ben. Kono haalugol ko longinaa kon ko maande fii gomdfinbe ben, hinaa fii be gomdfinaa ben.

<sup>23</sup> Si tawii moftal ngal fow mottondirii, mo kala no wowlude e haalaaji janani, hedotoobe nii tun arii, maa be gomdfinaa, e hara be wi'ataa ko on feetube? <sup>24</sup> Kono si tawii fow no haalude ko Alla longini d'un, mo gomdfinaa maa hedotoodo nii tun aru e taweede, d'un fow faaminay mo fii junuubaaji makko, jaawa mo kadi, <sup>25</sup> gundooji bernde makko nden kadi fejjinte, onsay o sujjay

---

<sup>n</sup> **14:21** 14.21 Isa. 28.11-12

ka leydi, o rewa Alla, o qirritoo wonde ko goonga Alla no hakkunde mon.

*Fii no Moftal ngal Haani Wonirde*

<sup>26</sup> Musibbe an, ko honno non warreten jooni? Nde mottondirdon woo, mo kala e mon no mari beytol, maa jannde, maa ko fejjinanaa, maa haala janana, maa noone nantingol. Yo fow wadire fii tiidengol. <sup>27</sup> Si no wowleede e haala janana, wota buru dido maa tato, e yo be lontondir, tawa kadi no woodi nantinoowo. <sup>28</sup> Si nantinoowo alaa, haray yo wowloowo on deyyu ka mottondiral, o yewtitoo ka bernde makko, o yewta Alla kadi.

<sup>29</sup> Fii haaloobe ko Alla longini d'un ben kapun, yo dido maa tato yewtu, beya taskoo ko yewtaa kon. <sup>30</sup> Si goddo goo fejjinanaama god'dun, yo oya on fanku. <sup>31</sup> Ko fii on fow hidon waawi lontondirde haalon ko Alla longini on kon, fii no fow jangira wakkiloo. <sup>32</sup> Ruuhuji haaloobe ko Alla longini d'un ben no yankinanii ben haaloobe ko Alla longini d'un. <sup>33</sup> Ko fii Alla hinaa Alla jiiboldu, kono ko mo o buttu.

<sup>34</sup> Ko yo rewbe ben deyyu ka hakkunde mbatu, wano woniri non e nder mofte gomdinbe ben fow, bay newnanaaka be ka be wowla, kono ko yo be wonu yankiniibe wano Sariya on kadi wi'ri non. <sup>35</sup> Si tawii kambe rewbe ben hibe faalaa andude e tobbe goo, yo be lando moodibbe mabbe ben tigi ka cuudi. Ko fii no hersinanii debbo yewtugol ka hakkunde mbatu.

<sup>36</sup> Kaa ko e mon daaluyee Alla on iwri? Kaa ko haa e mon onon tun o ari? <sup>37</sup> On mo sikki

ko haaloowo ko Alla longini d<sup>u</sup>n, maa yedaado dokkal iwrungal e Ruuhu Alla on, yo o jabu wonde ko mi windani on kon ko yamiroore Joomiraado on. <sup>38</sup> On mo itti yiila e d<sup>u</sup>n, wattantaake yiila e makko.

<sup>39</sup> Ko d<sup>u</sup>n wadi, yo musibbe an, himmanee haalugol ko Alla longini on kon, e wota on hadu wowlee e haalaaji janani. <sup>40</sup> Kono yo fow warru no haaniri non, hara ko no yaadiri.

## 15

### *Fii Ummatal Almasiihu on*

<sup>1</sup> Mi andinii on, yo musibbe, fii oo Kibaaru Mooyo mo mi fejjinani on, mo jabudon, on mo catidon e mun, tabitudon, <sup>2</sup> d<sup>u</sup>n ko on mo dandiracdon kadi, si tawii hidon jogori mo no mi fejjinirani on mo non, si tawii non hinaa non, haray on gomdfinii mo meere.

<sup>3</sup> Ko adii kon, ko ko mi hendii kon mi fejjinani on: Almasiihu on ko fii junuubaaji men din maayiri, wano windori non ka defte annabaabe ben, <sup>4</sup> o surraa, o immintinaa ka nalaande tammere, wano windori non ka defte annabaabe ben. <sup>5</sup> Oo wi'eteedo Petruusu yi'ii mo. E hoore d<sup>u</sup>n kadi sappoo e didooabe ben yi'ii mo. <sup>6</sup> Bawto d<sup>u</sup>n, buri musibbe teemedde njowo yiidi mo nde wootere, be tawata burbe ben e hakkunde mabbe no wuuri fewndo doo, wobbe ben maayiino. <sup>7</sup> Bawto d<sup>u</sup>n kadi Yaaquuba yi'i mo. E hoore d<sup>u</sup>n, \*sahaabaabe ben fow yi'i mo.

<sup>8</sup> Bawto bendon fow, o hollitii e an min kadi oo wa'udo wa jibinaado hewtaali. <sup>9</sup> Ko fii hari min mi hewtaa sahaabaabe ben, mi handaa kadi

e noddeede sahaabaajo, ko fii mido cukkotonoo \*moftal Alla ngal. <sup>10</sup> Ko sabu moyyere Alla nden wadi si mi woni ko mi woni kon. Awa kadi moyyere makko nden e telen-ma an wonaali meere. Ka liddu d'un, mi gollii buri be be fow. Kono fow e mun hinaa min, kono ko moyyere Alla wonde e an nden. <sup>11</sup> Ko d'un wadi, woni ko min, woni ko kambe, ko dundoo men waajii, ko d'un kadi gomdfindon.

### *Fii Ummatal Maybe ben*

<sup>12</sup> E hin-le, si men waajike wonde Almasiihu on immitike e hakkunde maybe ben, haray ko honno wobbe e mon wi'irta wonde ummutal maybe alaa? <sup>13</sup> Si tawno ummutal maybe alaa, harayno Almasiihu on tigi immitaaki. <sup>14</sup> Awa si tawii Almasiihu on immitaaki, haray waaju amen ngun ko meere, gomdfinal mon ngal kadi ko meere. <sup>15</sup> Haray kadi ko men seeditotoobe fenaande e fee Alla, ko fii men seeditanike Alla wonde o immintinii Almasiihu on, hara-le o immintinaali mo si tawno maybe ben immitotaako. <sup>16</sup> Ko fii si tawno maybe ben immitotaako, harayno Almasiihu on kadi immitaaki. <sup>17</sup> E si tawii Almasiihu on immitaaki, haray gomdfinal mon ngal ko meere, haray haa jooni hidon e nder junuubaaji mon din. <sup>18</sup> Harayno maydube e gomdfinal Almasiihu on ben ko hayrube. <sup>19</sup> Si tawii ko e nder oo aduna tun tanyinorden Almasiihu on, haray e hakkunde yimbe ben fow ko enen buri yurmude.

<sup>20</sup> Kono jooni non pellet Almasiihu on immintaama e hakkunde maybe ben, ko kanko woni

arano e d'un e n'der maybe ben. <sup>21</sup> Bay mayde nden ko sabu neddo gooto ardi, ummutal maybe ben kadi ko sabu neddo gooto ardi. <sup>22</sup> Wano fow maayiri sabu \*Aadama non, ko wano non kadi fow wuuritirta sabu Almasiihu on. <sup>23</sup> Kono mo kala e saffewol mun. Ko Almasiihu on woni arano on, si hikka d'on jeyaabe Almasiihu on ben, nande ardu makko ndun. <sup>24</sup> Ontuma, darngal daroo, ka o jonnitata d'on laamu ngun Alla Baabaajo on, bawto bonnugol kala laamu e kala bawgal e kala doole. <sup>25</sup> Ko fii bee Almasiihu on laamoo haa tuma o watti aybe makko ben fow ka ley koyde makko. <sup>26</sup> Gajpo sakkiteedoo muleede on, ko mayde nden. <sup>27</sup> Ko d'un wadi si Alla wadii fow ka ley koyde makko. Kono si wi'aama fow yankinanaama mo, ka haqiiqa, haray on Yankinando mo kala huunde tawaaka. <sup>28</sup> E nde piiji d'in fow yankinanoya mo, onsay Biddo on tigi yankinanto on Yankinando mo kala huunde, fii no Alla wonira fow e di fow.

<sup>29</sup> Awa ko hondun wonbe lootanaade maybe ben maande kisiye wadata? Si tawii maybe ben immitotaako few, haray ko fii hondun be lootantoo maande kisiye fii mabbe? <sup>30</sup> Enen non fii hondun saa'i kala hid'en e masiibo? <sup>31</sup> Nande woo mido weebitanii mayde nden. Mido seedintini d'un, yo musibbe an, wano mi mantori on non e n'der humondiral e Iisa Almasiihu Joomi men on. <sup>32</sup> Si tawii ko e faale nedisanke mi habiri kulle d'en ka saare Efesi, haray ko nafa hondun mi heboyta? Si tawii maybe ben immitoytaako: «Haray jaamen,

yaren, bay jango en maayay.»<sup>15</sup> <sup>33</sup> Awa wota on d'aynito, ko fii wondibbe bonbe bonnay jikkuuji moyyi.

<sup>34</sup> Awa artee e ko feewi kon, wota on wadu junuubu. Ko fii woßbe ben maraa gandal fii andugol Alla, ko fii hersingol on mi wowliri d'un.

### *Fii Balli Waylaadi d'in ka Ummatal*

<sup>35</sup> Kono goddo no gasa wi'ude: «Ko honno maybe ben immitoroya e ko bandu hondu be ardoyta?» <sup>36</sup> Ko an yo njofoojo, ko sankataa kon fudsataa si maayaali. <sup>37</sup> Ko sankataa kon hinaa bandu aroyooru ndun, kono ko abbere nii tun, no gasa ngawri maa awdi goo. <sup>38</sup> E hoore d'un, Alla yeda nden abbere bandu no o faaliraa, awdi kala o yeda d'un bandu ko hawrani d'un. <sup>39</sup> Bandu fow wonaa gootun: wonndu ko ndu nedfanke, wonndu goo ko ndu kulle, wonndu goo kadi ko ndu colli, wonndu goo kadi ko ndu liyyi. <sup>40</sup> No woodi kadi tagooje kammuyankeeje e tagooje adunayankeeje, kono ñari tagooje kammuyankeeje d'en no serti e ñari tagooje adunayankeeje den. <sup>41</sup> Naange ngen no mari ñari mun feere, lewru ndun no mari ñari mun feere, koode d'en kadi no mari noone ñariiji mun sertudi.

<sup>42</sup> Awa ko nii kadi wonirani ummutal maybe ben: si bandu nolayndu sankama, ko ndu nolataa immitoytoo. <sup>43</sup> Si bandu piddundu sankama, ndu immitodoyto e darja. Si bandu lo'undu sankama, ndu immitodoyto e doole.

---

<sup>15</sup> 15:32 15.32 Isa. 22.13

<sup>44</sup> Si bandu adunayankeeru sinkaama, ndu im-mitopto ruuhuyankeeru.

Si bandu adunayankeeru no woodi, haray bandu ruuhuyankeeru no woodi. <sup>45</sup> Ko dñun wadi si no windii: «Aaden arano on, dun ko Aadama, hebi ngurndan, o wuuri.»<sup>p</sup> Kono Aadama sakkitoro on ko ruuhuyankeeo yedoowo ngurndan. <sup>46</sup> Hinaa arano on woni ruuhuyankeeo on, kono ko banduyankeeo, ko ko hikkii don kon woni ruuhuyankejun dñun. <sup>47</sup> Nedñdo arano on ko e leydi ndin suutaa, ko mo ka leydi, nedñdo dimmo on kapun ko ka kammu iwri. <sup>48</sup> Ben be ka leydi no wa'i wa mo ka leydi on, ben be ka kammu kadi no wa'i wa on mo ka kammu. <sup>49</sup> Ko wano nanditirsen e mo ka leydi on non, ko wano non kadi nanditiroyten e oo mo ka kammu.

<sup>50</sup> E hino ko mi woni wi'ude kon yo musibbe an. Ka bandu ndun e yiyan dan waawaali hebude gebal ka \*laamu Alla cfon, ko cfon kadi woni ko jolata hebataa gebal e ko jolataa kon. <sup>51</sup> Awa e hino, mido wowlande on gundoo: en fow en maayataa, kono en fow en waylete, <sup>52</sup> e nder saa'ihun nii, yero mayaango yiitere, ka wuttaandu \*liital sakkitoral. Ko fii ngal wuttete, maybe ben immitoo ko bontataa, onsay enen non en waylete. <sup>53</sup> Onsay bee nduu bandu jolayndu lontiniree ndu jolataa, awa kadi bandu maayayndu ndun lontiniree ndu maayataa. <sup>54</sup> Nde ndun bandu jolayndu lontiniraa ndu jolataa, e nde bandu maayayndu ndun lontiniraa ndu maayataa, onsay daalol windiingol ngol laatoto, wonde:

«Mayde nden modaama e nder polgal.»<sup>q</sup>

<sup>55</sup> «Ee mayde, ko honto polgal maa ngal woni?

Ee mayde, ko honto ndagawal maa ngal woni?»<sup>r</sup>

<sup>56</sup> Kono ndagawal mayde ko junuubu, awa kadi doole junuubu ko Sariya. <sup>57</sup> Yo mantoore wonan Alla, on Yedudo en polgal immorde e Iisaa Almasiihu Joomi men on.

<sup>58</sup> Awa yo musibbe an yidaabe, wonee tabitube be dillintaako, burtee beydaade e golle Joomiraado on, e hoore andugol wonde, golle mon den e telen-ma Joomiraado on hinaa meere.

## 16

*Fii ko Faaboraa kon Gomdinbe ben  
Yerusalamaam*

<sup>1</sup> E telen-ma mottindirgol fii wallitagol yimbe Alla ben, wadiree onon kadi wano mi yamiriri \*mofte wonde Galaasi den non. <sup>2</sup> Yo mo kala e mon hebu ko anniyii, wallini feere beru maral makko ngal ka jallal aranal e nder yontere nden, dun ko alattiire nden, fii wota on habbo haa tuma mi ari fii mottindirgol dun. <sup>3</sup> Dun, nde mi aroyi, mi wattiday e be subidon ben dokke mon den, wondude e bataake, be naba \*Yerusalaam. <sup>4</sup> Si tawoyii non bee mi yaha min tigi, mi yaadoway e maabbe.

*Fii Ebbooe Puulusa den*

<sup>5</sup> Mi yahoyay ka mon nde mi tayitoyi Masedonii, ko fii mi rewoyay Masedonii. <sup>6</sup> No gasa mi pallidoyay e mon, maa toode mi ruumida e mon, fii no ardoron mi ka mi yahata ton. <sup>7</sup> E

ngol laawol doo mi faalaaka rewude ka mon e hoore hawjere, kono mido tanyinii wondugol e mon seeda, si Joomiraado on newnii. <sup>8</sup> Kono fow e mun, mi wonay Efeesi haa ka Juldeere \*Pentakosta. <sup>9</sup> Ko fii dambugal njanal udditanike golle an nden, awa kadi aybe ben no d'uuudi.

<sup>10</sup> Awa si Timotee hewtii, wadfiree noone no o hulirtaa hakkunde mon, ko fii himo gollira wa an min e nder golle Joomiraado on. <sup>11</sup> Awa wota gooto aybin mo. Neltee mo e jam fii no o hewtira ka an. Ko fii mido habbodi mo e musibbe ben.

<sup>12</sup> Telen-ma oo musidso an Apoloosi, mi wakkilinii mo fota fii yaadugol e musibbe ben ka mon, hinaa non d'sun woni faale makko on fewndo d'oo. Kono o yahoyay nde o hebi fajuhun.

<sup>13</sup> Wattanee yiila tabiton e nder gomdinal ngal, wakkilodon, tiidon. <sup>14</sup> Ko wadoton woo wadfiree giggol.

<sup>15</sup> Mi yamirii on kadi yamiroore goo, yo musibbe an. Hidon andi ko beynguure Astefaana nden adii gomfinde e nder Akaaya, be woni kadi e kurkanagol yimbe Alla ben. <sup>16</sup> Awa onon kadi yankinanee ben yimbe e kala golli-doobe e mabbe. <sup>17</sup> Awa mido weltori arugol Astefaana ngol, e Fortunaatusa e Akayuuka, bay be wadanii lan ko on waawataano wadande lan. <sup>18</sup> Ko fii be wallintinii wonkii an kin wano be wallintiniri wonkiiji mon din non. Awa manee sifa ben yimbe.

### *Fii Salminaango ngon ka Waynondiral*

<sup>19</sup> Moftal ngal \*Aazii salminii on. Akiila kadi e Piriskiila, wondude e moftal wongal ka suudu mabbe ngal, salminii on fota e innde Joomiraado

on. <sup>20</sup> Musibbe ben fow salminii on. Salmondi-  
ree, hirbondiron hirbondiral laabungal.

<sup>21</sup> Min Puulusa, mi salminirii on jungo an  
ngon tigi. <sup>22</sup> On mo yidaa Joomi on, yo o laato  
hudaado. Yo Joomi on aru! <sup>23</sup> Yo moyyere Iisaa  
Joomi on wonu e mon. <sup>24</sup> Mido yidi on on fow  
sabu Iisaa Almasiihu on. Aamiina!

**Version Pular Fuuta-Jallon  
The New Testament in the Fouta-Jallon Pular  
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact [wab.admin@pbt.org](mailto:wab.admin@pbt.org).

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

---

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6